

Dene köcökpa te Pawülü ba fü Tito Tito

Masere si-ngü

Dene köcökpa te Pawülü ba fü Tito. Ngü ka Tito ta bane. Engu ka-ye de engu *Giriki, ah de engu *Yisarayeke baka Pawülü nda de. (Mü ena amaka ngü la gbü Galatiya 2:3). Ah ba e te Tito to ta maguma ye fü Yesu, esaka Pawülü, o Pawülü ngbü ta emala ngari Yesu, endondoro di ne, angü Pawülü i engu, gü ba “Ye ni”. (Mü ena amaka ngü la gbü Tito 1:4). Teka ngü la, fü Tito angbü ta ele ta-ngü te Pawülü efa sü, gbü tima ka Me. Fü ewü adi endoro ake di zalü akoro agbü Yerüsalema. (Mü ena amaka ngü la gbü Galatiya 2:1-5). Fü Pawülü akpo da etima engu agbü wü gara sü, teka adi eceka wü kpara, te ewü le ngü ka Yesu gömö ni, Pawülü ne, kpah teka de ah di edu, emala nga ewü fü ni. Anga gara ne, ah ngbü etima Tito de köcökpa, te engu ba de züka riri fü wü kpara la.

Gbü gara sikipi, fü wü Pawülü ayia de wü Tito, anü akoro agbü gara sü de iri ye Kürete. Fü ewü angbü kpala, da emala ngari Yesu fü wü kpara. Fü Pawülü ayia ace Tito ciki sela, ayia anü agbü gara sü. Pawülü ba köcökpa ne fü Tito, o engu di fi bü agbü Kürete, angü Pawülü ce engu kpala, teka amere gara tima te laki sidi nga ye.

Si-ngü ka köcökpa te Pawülü ba fü Tito ne, ah ngbü esere ngü ka tima te ni, Pawülü, to esaka Tito.

Sapita 1 Wü ngü te di teka wü *kovo gbü tima ka Me, te Tito ena afe ewü, teka aceka kpì fütanga wü bu wü ne

Sapita 2 Wü riri teka gara wü kpara, te ewü ngbü emere tima ka Me, baka wü mere kpara, bete wü mere wü rüse, wü mada, de wü ka'dörö, anga wü labi

Sapita 3 Riri fü wü kpara ka Me 'buru

Dene mandì ka Pawülü fü Tito

¹ Wayi bala Tito, de-ra Pawülü, ma to köcökpa ne fü mü me-ra, angü ma de labi ka Me, ma kpa de *mürü tima ka Yesu *Kurisito. Me tima ra me-ye teka ato wazi fü wü kpara ka-ye te engu fe ewü, de ma di kpa erì ewü de zu ngari Me, teka fü ewü adi emere züka ngü gbü jia ni, Me. ² Kpa bala, teka de wüh o jia wü teka *küküwa ka fi mere badi ne. Angü Me mala ta eyi bala gügü, gü ba, “Ni ena aküwa wü kpara, te ewü le ngü ka-ni.” Ah fanü, engu ti asu wu de. ³ Te di bala, gbü sikipi te Me fe ne, ah gü tamu ngü ka-ye la eyi fü wü kpara, angü engu de *E-küwa-nih. Dela si-ngü te engu o ra mürü tima ka-ye tete, teka de ma di emala ngü ka-ni la fü wü kpara ne.

⁴ Tito enga ra, ma tima köcökpa ne fü mü me-ra, mü zu de ye ra, te nih to maguma nih eyi 'buru fü Me. Wö nih, Me, ake Yesu Kurisito E-küwa-nih, di de mü, de wüh to gu ngü fü mü, de *züka maguma wü.

Dene si-ngü te ma ce mü tete agbü Kürete

⁵ Enga ra, ah le de mü ngbü fi bü agbü Kürete kpala, kpah ba e te ma mala fü mü, teka fü mü areke gara wü ngü te lakı sidi nga ra. Ah le de mü fe wü *kovo, ao gbü tima ka Me, te nga nzö wü köti de kpala 'buru.

⁶ Wü kpara te mü ena afe ewü ne, ah le de wüh di wü kpara, de te ewü mere *siti ngü de, te wü kpara 'buru ngbü eceka ewü ba züka wü kpara. Ah le mene kpara te ngbü engbü ka-ye nzö ake wara ye biringbö. Ah le de wü jaji ka-ewü di de züka wü kpara, te ewü to maguma wü eyi fü Me, da eje riri ka wü wö wü. Wüh di kpah de wü jaji, te wü kpara ti amala siti ngü eküte ewü de. ⁷ Angü te kpara de kovo gbü tima ka Me la, ah le de engu mere siti ngü de. Ah mere e adi de mürü kögö-nzö kpah de. Ah mere e amere gü kpah de. Ah mere e adi eküya de fi de. Ah wü nga kpah de. Ah ngbü de gümü jiase kpah de. ⁸ Ah di de kpara te ngbü emere ngü wü ngba ereke areke, da ele ta-ngü te ewü. Ah di ele duu züka ngü. Ah di kpah de züka fingangü gbü nzö ye, da emere züka ngü gbü jia Me. Ah di de kpara te etüka te-ye atüka, teka wü gümü ngü ka küte. ⁹ Ah di de kpara te elala te zu ngü ka Me, baka te nih ri engu di. Angü ah ti eyi ari wü bu ye, de ngü ka Me mbi mbi mbi, da eto wazi fü ewü. Ah ti kpah eyi aza ngü gömö wü kpara, de te ewü ngbü ega yiki teka ngü ka Me ne.

¹⁰ Angü mere bi wü mürü kögö-nzö ladü, te ewü ngbü efiti wü bu wü de töndö ngü ka-wü la. Gara wü di enga *Yisarayeke ngbü emere

ngü la bala, gü ba, “Ah le de wü *kpara ka Yesu di emere gele ka-ani.” ¹¹ Ah le de mü tata ewü de siti riri ka-ewü la, angü wüh ngbü efiti mere bi wü kpara, kpah de wü würose, de wü jaji mini. Wüh ngbü esiti fingangü ka wü kpara de töndö riri ka-wü la, teka de ani di emaka jiasa esaka ewü. ¹² Tane, gara mere kpara esüka wü kpara ka Kürete mala, gü ba, “Gbü wü sikpi 'buru, wü kpara ka Kürete ka-wü de wü mürü wu. Wüh baka siti wü nü, angü wüh de wü mürü töndö, wüh kpah de wü mürü maguma, te ewü o fingangü ka-wü nzö teka zü-e.” ¹³ Ngü kaka la, ah fanü. Teka ngü la, ah le de mü ri ewü kpekpeke, teka fü ewü azoro lö Yesu de kpa wü 'basu, kpah da eje ngü kaka. ¹⁴ Teka ngü te wü di engä Yisarayeles ngbü emala, gü ba, “Ah le de yi di emere gele ka-ani” ne, mü mala fü ewü, gü ba, “Dela ka-ye töndö ngü!” Angü wü kpara te ewü ngbü emala ngü de bala, wüh le ngü ka Yesu nda-wü de. ¹⁵ Angü, te mü to maguma mü eyi fü Yesu la, e füh kotö ne, te ena asiti mü gbü jia Me, nda ma. Ngü ka-mü ena adi 'buru mbi gbü jia Me. Amba, te mü to maguma mü fü Yesu de la, mü ti amere züka ngü gbü jia Me nda-mü kpah de, angü fingangü ka-mü ka-ye fi bü esiti. ¹⁶ Ah kpah bala, fü wü kpara, te ewü ngbü eri wü bu wü de siti riri ka gele ka wü Yisarayeles la. Angü wüh gü ba, “Ani wu ngü ka Me eyi 'buru.” Amba de, ah ka-ye de wu! Wüh ka-wü de wü mürü kögö-nzö, te ewü je ngü ka Me de. Te di bala, Me ena ato kuru te ewu te gara, teka siti ngü ka-ewü la, ato.

2

Dene zu ngü ka Me, te mü ena adi erī wü kpara di

¹ Amba nda-mü, Tito, ah le de mü rī wü kpara, de wüh ngbü mbi, adi emere züka wü ngü, baka ngari Me, te a rī mü di. ² Mü mala fü wü cögbörö kpara, de wüh di de kpeke wü kpara, de züka fingangü gbü nzö wü. Wüh zoro Yesu de kpa wü 'basu, da eje ngü kaka, kpah da ele wü bu wü de maguma wü 'buru. Wüh di etüka te-wü, da ei maguma wü gö! gbü ngü ka Me.

³⁻⁴ Mü mala kpah fü wü cögbörö würüse, de wüh ngbü baka züka wü kpara ka Me. Wüh mere e angbü wü mürü ambala'ba de. Wüh o to wü teka fi kpah de. Wüh di kpah erī wü mada, teka de wüh di emere wü ngü 'buru ba e te ti gbü jia wü kpara, kpah da ele wü watī wü, de wü jaji ka-wü. ⁵ Wüh di erī ewü, de wüh di emere tima agba wü mbi mbi mbi, de züka fingangü gbü nzö wü, da eje riri ka wü watī wü. Angü, te wüh je ngü ne de la, wü kpara ena asiti iri wü *kpara ka Yesu, teka ngü ka-ewü la.

⁶ Kpah bala, mü rī wü ka'dörö kpekpeke, de wüh ngbü de züka fingangü gbü nzö wü, da etüka te-wü teka siti gümü wü e de füh kotö ne. ⁷ Amba zu teka mü, Tito, ah le de mü ngbü fi bü da emere züka ngü, te ngbü ereke gbü jia Me. Angü wü kpara ena awu da emere züka ngü, teka ngü ka-mü la. Mü ngbü kpekpeke, de züka fingangü gbü nzö mü. Fü mü angbü kpah da erī wü kpara de zu ngari Me, de maguma mü 'buru biringbö. ⁸ Mü rī wü kpara de züka riri, teka avi

jia wü vügü, de te ewü le ngü ka Me de ne, angü wüh ena agiri kaje teka amala siti ngü eküte nih ma.

⁹ Mü mala ngü fü wü labi kpekpeke, de wüh di eje riri ka wü mere kpara ka-wü. Wüh di emere wü ngü 'buru te ena adi ereke gbü jia ewü. Wüh mere e alügü siti ngü fü mere kpara ka-wü de.

¹⁰ Wüh mere e adi ezi e ka wü mere kpara ka-wü kpah de. Wüh di emere tima ka-wü kpekpeke de maguma wü 'buru. Te wüh mere bala la, wü kpara ena angbü egbo nga Me, E-küwa-nih ne, teka ngü ka-ewü la.

¹¹ Ma mala ngü la fü mü kükürü de, angü Me gara tamu *züka maguma ye eyi fü wü kpara 'buru, gbü ngü ka Yesu *Kurisito. ¹² Dela ngü te Me mere fü nih, teka fü nih amaka wazi, ace ngü ka kögö-nzö, bete ngü ka gümü wü e de füh kotö ne. Fü nih adu angbü de züka fingangü gbü nzö nih, teka adi emere wü ngü 'buru mbi, o nih di la de jia nih füh kotö ne. ¹³ Nih ngbü emere wü ngü de bala, kükürü de, angü nih ngbü eci nga züka tadu, te nih ena amaka te gara, gbü sikpi te Miri ka-nih Yesu Kurisito ena adu akoro tete. Nih gbo nga iri na de koko de karayi! Angü engu de Mere Me, ah kpah de *E-küwa-nih. ¹⁴ Engu to ta te-ye, akpi teka aküwa nih, teka afü nih, ao wü di ye tete, teka fü nih ace *siti ngü ka-nih, adu ao to nih 'buru teka adi emere züka wü ngü füh kotö sene.

¹⁵ Dela wü ngü te mü ena angbü emala cu de wazi mü 'buru, angü wüh o mü eyi mere *kovo gbü nzö wü kpara ka Me. De mü di eto wazi fü mene wü kpara, te ewü ngbü emere

zūka ngü ne. Mene ewü, te ewü ngbü emere siti ngü ne, de mü di erī ewü kpekpeke, teka fü ewü ace wü ngü la ace. De mü ngbü de jia mü te mü, teka fü wü kpara awu zūka ngü ka-mü, angü wüh ena afala mü.

3

Dene kpah gara ngü, te mü ena adi erī wü kpara ka Me di

¹ Tito, enga ra, ah le de mü rī wü kpara kamü de ngü ne mbi mbi mbi, teka fü ewü angbü de zūka fingangü gbü nzö wü, da ecu ngü wü mere kpara ka-wü, de wü miri, kpah da eje riri ka-ewü mbi mbi mbi. Ah le de wüh reke tewü, teka adi emere wü zūka ngü fü wü kpara 'buru. ² Wüh mere e adi emala siti ngü eküte kpara de. Wüh ngbü ziii, de gu ngü ka Me emagama wü. Wüh ngbü kpah de gu maguma esüka wü de wü kpara 'buru.

³ Angü nih ta 'buru wü töndö kpara, kpah baka wü bu nih füh kotö ne. Nih ta de wü mürü kögö-nzö. Nih ngbü ta edürü te wü siti kaje ka-nih kpikpi ye kpikpi ye. Angü ku ka *siti ngü i nih ta me-ye, teka gümü wü e de füh kotö ne. Nih ta wü mürü siti maguma, wü mürü makpü, angü nih ngbü ta ekpü te-nih de wü kpara 'buru. ⁴ Amba, o nih ngbü ta emere wü siti ngü la bala, fü Me ayia amere zūka ngü fü nih, angü ah tima Yesu *Kurisito teka aküwa nih, teka mere lele kaye. ⁵ Nih efi nda-nih, gü ba, Me küwa nih teka zūka tima te nih ngbü emere? A'a, ah bala de. Me küwa nih 'duwa teka *zūka maguma ye. Angü cinga nih rī tete fa sü. Fü engu aküwa nih,

azürü nih gbü wü siti ngü ka-nih, adu abī nih kpah toto gbü wazi ka *Nzila Wazi ye. ⁶ Angü engu to Nzila Wazi ye fü nih reke areke, teka ngü ka Yesu Kurisito, *E-küwa-nih ne. ⁷ Me to Nzila Wazi ye fü nih bala, teka afü nih wü di ye tete, teka fü nih amaka *küküwa te gara agbü kpī kpala. Angü ah fü nih me-ye züka wü kpapa ka-ye tete, teka züka maguma ye.

⁸ Dela kpeke riri fanü fanü. Ma ele de mü ri wü kpapa ka Me di kpekpeke, teka fü ewü ato te-wü 'buru, angbü emere wü züka ngü, te ena areke wü bu wü. Dela züka riri te ti eyi ato wazi fü wü kpapa 'buru.

⁹ Amba teka wü mürü kögö-nzö, te ewü ngbü efüfü *ngari Me, da edünda de ngü ka gele ka wü *Yisarayeke, kpah de iri wü kundu wü de ta gügü ne, mü mere e angbü ega yiki de ewü de, angü ngü la ti ale ta-ngü te kpapa nda de. Dela ka-ye töndö ngü kükürü. ¹⁰ Angü, te kpapa kpo da esiti nzö wü bu ye de gara riri te di kpikpi ye la, ah le de mü ri engu ari. Te engu le aje ngü la de la, de mü du ri engu du 'basu. Te engu je ngü nda fi de la, de mü ce engu ace. ¹¹ Angü nih wu eyi fanü, gü ba, kpapa de bala ce züka ngari Me eyi gügü, teka angbü emere siti wü ngü ka-ye ladru. Te di bala, ah kolo liya ka-ye eyi de tete ye, angü Me wu siti ngü kaka la eyi.

Dene adu ngü ka-ra

¹² Ma ena atima Aritema, anga Tikiko kpapa mü la. Te kpapa la koro eyi la, mü mere e ayiri kpala de. Mü yia kere, anü amaka ra agbü

Nikopolī. Angü ma ngbü efi ta teka angbü kpala, zalü akoro di gbü fe ka bala.

¹³ Teka ngü ka Zena* ake Apolo ne, te ewü le ayia anü agbü gara sü la, de mü le ta-ngü te ewü reke areke, teka nünü ka-ewü la. ¹⁴ Kpah bala, ah le de mü mala fü wü kpara ka-nih, de wüh o to wü teka adi ele ta-ngü te wü mürü cinga. Wüh mere e angbü mürü basa de.

¹⁵ Wü kpara 'buru te a di de ewü sene to mandī fü mü. Mü to mandī ka-ra fü wü kpara de te ewü to maguma wü fü Me de kpala 'buru. Me di de yi kpala 'buru, da eto wazi fü yi, de *züka maguma ye.

Dela adu ngü ka-ra. De-ra Pawülü.

* **3:13** 3:13 Zena ta de mürü riri.

To Ngü Mürü ka Me bete Gina Ngü (S Sudan)
Mündü: To Ngü Mürü ka Me bete Gina Ngü (S
Sudan) New Testament+

copyright © 2005 Wycliffe Bible Translators, Inc.

Language: (Mündü)

Contributor: Wycliffe Bible Translators, Inc.

All rights reserved.

2020-11-19

PDF generated using Haiola and XeLaTeX on 21 Feb 2024 from source
files dated 29 Jan 2022

9787304f-bc80-5421-9b63-c767eb819b6f